

四庫全書

集部

欽定四庫全書

元憲集卷二十六

宋 宋庠 撰

外制

大理評事監在京廣衍倉李艷可光祿寺丞制

敕具官李艷地襲華腴世承燕翼鄉繇卿屬參掌國儲  
官勤有庸歲滿無殿嘉其最狀稱厥懋恩俾改膳卿之  
聯尚修庾司之職可

大理評事知建昌軍南城縣李虞卿可光祿寺丞

制

敕具官李虞卿緣文有資階蔭而祿比繇評猷之秩外  
寄絃歌之才三年質成百里兼最膳卿補屬令組載華  
勉績前勞尚佇來賞可

大理評事監海州酒稅王誨可光祿寺丞制

敕具官王誨世祿妙年相門餘慶比從外掌克服攸箴  
滿歲敘勞倍官有秩宜參膳卿之屬且酬海邦之筦勉

履寶訓無忝茂恩可

十二考人前權福州支使張貴和可大理寺丞奏

舉人前知陳州宛丘縣宋孝孫可衛尉寺丞制

救具官張貴和等序登仕籍祇率官常並敦勤吏之風  
罕絀簡書之責比因成課來調中銓或赦令之議年或  
薦章之保任質于彝典符厥賞條俾補屬于卿丞且勸  
能于選部可

奏舉人前撫州司理參軍孟造可衛尉寺丞制

敕具官孟造本偕鄉能入服銓調嚮司行獄介于江湖而民挾詐輕吏困叢密惟爾善職訖無頗辭交章以聞覈課尤審宜酬歲考升佐衛卿益懋修方之勤且光擢俊之舉可

奏舉人前鄧州司理參軍歐陽宗閔可衛尉寺丞制

敕具官歐陽宗閔夫選條以累勞為資格詔書以陟狀舉滯淹勤庸相當乃議甄擢以爾處躬無玷効智有初

游更州縣之勞罔結簡書之責灼焉善最副厥薦言宜  
改佐于卿司用勸能于公路可

太常博士集賢校理錢延年可尚書祠部員外郎  
制

敕具官錢延年世德載靈孺年筮仕早嘉學治之劬參  
服讎書之勤亦既登朝游俾從政頃倅州事自遘家艱  
逮闋制而復官屬稽勞之滿歲司禋列局承務有聯且  
寵握蘭之資更光抱槩之業可

太常丞直集賢院判三司都理呂公綽可太常博

士制

敕具官呂公綽唐典博士隸奉常者為六品清官曩制  
相沿今選尤重以爾氣調秀舉才致敏通雖籍公臺之  
華躬修儒素之檢以奏技帖仙職以累伐佐計籌參會  
課條甫越葢閏宜繇陪棘之屬進繕置茅之儀姑為寵  
階尚服煩使可

秘書丞知鬱林州黃中可太常博士殿中丞監真

州權貨務孫祖道可國子博士制

敕具官黃中等夫考吏之法覈實為先沿勞限年按狀遷秩則政不壅而才有敘矣以爾等或懿文筮仕方為政于海區或精力首公適幹利于江界並列成課集于攸司宜從歲滿之遷以勸官成之效禮臺學省博士有員即而授之勉服華寵可

殿中丞陳希亮可太常博士制

敕具官陳希亮曩繇辭等服我仕途官率攸箴文能毋



害比成縣譜之治入齒朝紳之華自上歲勤參符考目  
俾繕儀于漢苑且光績于虞篇往踐榮階益固清守可  
前鄭州原武縣令游開可著作佐郎制

敕具官游開業文登科絜矩從政比為右輔之邑見舉  
外臺之章銓覈上聞朝恩有典宜參秘籍用寵官成可  
淮南轉運使李昭述男仙卿可試秘書省校書郎  
制

敕具官李昭述男仙卿乃父以望郎之華膺別使之選

授節云始任子有常矧鱣序之令門服鯉趨之清訓膺  
茲延賞必克嗣徽往試讎書之榮無忘食德之舊可

益州路轉運使楊日嚴男公度可試秘書省校書  
郎制

敕具官楊日嚴男公度任子之令所以裒官勤而延世  
賞也惟乃父察使于西州方促萬里之行曾無九折之  
憚宜榮吏牒以寵親庭優學勵躬無忝來遇可

廣南東路轉運使龐籍男元魯可試秘書省校書

郎制

敕龐元魯乃父以被詔天臺揚旌嶺服方罄首公之節  
且授任子之恩將責使勞宜推世賞免膺學筮以寵私  
門可

駕部郎中致仕辛惟簡男炤可試秘書省校書郎  
制

敕具官辛惟簡男炤迺者詔書吏有引年辭仕者許上  
一子名以補吏所以寵退身厚世祿也乃父惟簡老于

郎潛願去朝班且及恩典庇嗣之請今俾往試儻書勉  
蹈清規無忝余賞可

前鄉貢進士石洵直等三十三人並可守秘書省  
校書郎制

敕石洵直等迺者深詔庶邦並舉髦士必加參練乃允  
詳求以爾等署行鄉書露材貢部紛懷鉛而就列成摛  
藻以奏篇蔚有深辭可躋異等因其中選榮以修方秘  
局校文京員錫綬勉敦儒範以對朝恩可

河北都轉運使楊偕姪孫景芬可試秘書省校書

郎制

敕具官楊偕姪孫景芬爾之從祖久服計臣比升榮聯  
且委雄部適駕言于使傳遽餘蔭于私庭責效云初延  
賞奚吝俾試讐書之秩用懋貽孫之謀可

廣南東路轉運使鄒覃男之才可試秘書省校書

郎制

敕具官鄒覃男之才乃父歸服詔恩遠督方漕頻海之

部踰嶺實勤且援比以上書願因勞而任子眷言遐役  
宜允所陳俾試讎書之榮無忘延世之獎可

廣南西路轉運使尚書都官員外郎韓琚男景修  
可試秘書省校書郎制

敕具官韓琚男景修以乃父進服朝恩遠將使漕眷言  
踰嶺之部方責乘輅之勤受節云初需頭有請固宜延  
賞參勵教忠特試讎書之榮且盡任子之典可

尚書比部員外郎知澤州孫昌可尚書駕部員外

郎國子博士通判鄧州呂務簡可尚書水部員外

郎制

敕具官孫昌等昔漢明帝有言郎官應列宿宰百里非  
其人則民受其害況攝郡榮倖藩條者乎惟爾等或通  
經而才或藉蔭而仕並絜矩從致濯纓登朝而方出麾  
高平關掌宛下新績舊課通質歲成宜進諸曹之聯且  
先所部之寄欽服並命毋替寵階可

尚書屯田員外郎黃汴河催綱劉立言前通判台

州閭鼎可尚書都官員外郎制

敕具官劉立言等懷文飾吏選俊為郎或護漕河渠或  
贊條符竹並階前績通續今勞宜循滿歲之格進貳中  
都之秩兼仍事守以結最凡可

尚書比部員外郎通判嘉州郭宗禮可尚書駕部  
員外郎尚書虞部員外郎通判祁州成壁可尚書  
比部員外郎國子博士知貝州歷亭縣成道升可  
尚書虞部員外郎制



敕具官郭宗禮等尚書郎有掌輿駕鈎簿領典虞衡之  
職皆曹劇任要列于天臺時惟寵名以待功次爾等通  
經筮仕從政累勞六計本乎至廉一心蹈于無懈或關  
決州務或仍宰縣封歲月有成凡最來上遞進某等咸  
協乃庸無渝素誠忝我休命可

尚書虞部員外郎知金州師仲說可比部員外郎  
太常博士知貴州陳堅可尚書屯田員外郎制

敕具官師仲說等夫稽歲質成世有曩法故虞陟明宣

責實皆是物也爾等或食德之裔或修辭之良頗濟吏  
文實我朝紘並緣靡盬之效出副惟良之求雖姚墟舊  
藩駱越遐境成績未報前課可甄比勾劇曹頓升華序  
各膺郎位之選尚結州麾之最可

尚書虞部員外郎張楷可尚書比部員外郎制

敕具官張楷久服師規序參郎選嘗奉行于寬詔俾攝  
守于名城屬此還臺適當會課酬其歲滿寵以階升往  
踐勾書之曹彌遵絜矩之訓可

尚書虞部員外郎梁餘慶可尚書比部員外郎制  
敕具官梁餘慶學古而官累勞以日旡階最目序充郎  
位比關隴倅事條教有倫逮茲還臺適遇稽伐宜承比  
勾之務且寵年庸之勤勉服稍遷以格來舉可

太常博士施昌言可尚書屯田員外郎制

敕具官施昌言職理淹深風華秀舉曩由高第仍佐外  
藩政游考于歲成學不忘于時敏廼者嘗俞奏牘命試  
禁林逮給札以來目成篇而喜嘉其進業寵以為郎勉

蹈儒猷允光朝序可

太常博士劉適可尚書屯田員外郎制

敕具官劉適辭誠並修器幹兼裕早中科等遂服政經  
刃解煩而有餘文飾吏而毋害自引籍朝著結綬縣章  
官靡曠離歲亦淹久嘉其奏課寵以為郎宜踐田曹之  
華且光磐羽之漸可

太常博士前知夔州巫山縣魏平仲可尚書屯田  
員外郎制

敕具官魏平仲器韻清舉才謀簡濟早有休問齒于英  
游自解巾昌辰束帶榮序文飾吏而毋害績當官而可  
底三歲會課我朝彝章矧更縣道之勤宜副田曹之務  
益服賢志用光郎選可

太常博士牛圭可尚書屯田員外郎制

敕具官牛圭曩修辭誠游効官職比階司蕝之籍出尹  
象雷之封間被臺符移贊州事緬是封略雜于民夷治  
無殿科歲有遷格宜因覈課之審卽寵為郎之拜尚仍

所莅勉集後勞可

尚書祠部員外郎崇文院檢討天章閣侍講王宗  
道可尚書度支員外郎制

敕具官王宗道被服儒猷祇勤官次早用士林之選首  
從王邸之招員在胄庠職兼書館多歷年籥進備朝簪  
屬開講道之筵俾預敷經之列擢緣內閣參訂露門帖  
以寵名志在榮遇而宗英刻奏學肆叙勞且冀稍遷重  
違所請宜改承于郎務益詳究于典言最爾清修對我

甄獎可

前權相州觀察支使郅慕清可檢校尚書水部員

外郎制

敕具官郅慕清國家竣事東耕均禧庶品官無內外賞  
有彝常以爾從辟廉車累勞仕籍方茲展體慶乃丁辰  
宜視秩于郎曹用圖勤于幕畫可

授柴宗慶開府儀同三司依前檢校太師同中書

門下平章事武成軍節度使駙馬都尉加食邑實

封制

門下朕丕承先謨恭恤明祀獲執牲幣祇見神祇適當  
拜胙之成思均與物之況矧余右戚參視貴臺久擁旌  
旄之雄時勤屏翰之績不有異數疇聳庶邦具官柴宗  
慶淳固蹈常柔嘉廣業地承伐閔之舊才對肅雍之華  
能興乃宗遂膺斯仕以藩侯而奉朝請多歷歲時因元  
帥以敦詩書自恬風素逮兼槐席之重出臨棠舍之封  
允迪惠和且宣條教屬禋嚴之誕布率貢品以惟寅身



雖守藩志則存闕忠勛並劭戡祿爾宜是用冠文階之  
崇優食采之典茂厥真賦濟于壯猷於戲天秩之隆非  
式禮而奚敘公餼之荷惟持滿而克安益服令圖往即  
榮次授受之戒可不勉歟可

授陳堯佐光祿大夫依前檢校太傅同中書門下  
平章事淮康軍節度使加食邑實封制

門下薦誠類帝所以格三靈之和均禧拜胙所以優四  
海之澤倚吾舊老之雋方制中權之雄兼榮鉉臺參殿

褰服禮成第賞朝論攸歸具官陳堯佐志意冲夷風槩  
高勁抗心希古學有本原展體首公政多緣飾逮事列  
聖目為名臣寢階謨猷遂翊機柄洎入正于槐路實增  
煥于袞章鼎雖內解政樞寵頒齋鉞仍宰庭視品之峻  
冠友邦維翰之良賢勞並均體貌無改升禮已事布號  
崇朝宜增命數之繁且昭貺施之普崇階馭貴多邑衍  
封益以實祖會為異渥於戲天錫之祉余弗敢專師僉  
之諧疇可虛授往虔誕告之寵益契同寅之懷矧在耆

明無假多諭可

授鄭守忠光祿大夫依前檢校戶部尚書寧遠軍  
節度使殿前副都指揮使加食邑實封制

門下王者受釐于天理弗專饗疏爵于位勸必有功粵  
惟將臣翊我齊輅勞施伊始均福攸同事圖剛辰參布  
明命具官鄭守忠性尚淵濟才質颯果感會亨旦策發  
壯猷多通兵技之學早著和門之業洊書勲籍久服禁  
屯或訓練徒兵或董齊越騎進階征鉞之重遂司交戟

之嚴夙夜靡渝親寄無貳屬圖郊類躬展國容實提北  
落之師來備甘泉之仗導迎街蹕循徽巖廬大禮克成  
寢威有助宜酬從祀之恪允昭進律之文特峻貴階載  
陪多邑仍真幹食僉允朝言於戲善保者位高而安能  
力者道遠而勵曾是異數孚于厥勞往哉汝諧毋替終  
譽可

授楊崇勳開府儀同三司依前檢校太尉河陽三  
城節度使加食邑實封制

門下朕奉事天明肅祇郊配內則公卿顯相率禮不愆  
外則岳牧協恭以職來助馨德昭邕鴻釐普臻爰洽揚  
庭之恩用褒維屏之寄具官楊崇勲精忠以力沈毅而  
和早會聖期號為慎將休有成績播于公言寢酬武幹  
之庸正司機務之柄告猷克壯廣業彌勤逮倚陪京之  
藩洊易均賢之地而能恪守侯度允藝貢常交撫大邦  
之人并蒙中甸之福屬茲第賞協乃懋功是用訂公府  
之儀增采地之數仍因真食俾衍故封朝謀僉承獎策

參備於戲惟帝錫祉有格來之藩惟辟申恩有厚往之  
報宜循進等之授益寵于宣之良往對光亨無煩訓諭  
可

授荆王依前守太師尚書令兼中書令行荊州揚  
州牧荆南淮南節度大使加食邑實封功臣制

門下協邦惇族義炳唐篇受朕展親道光姬宗列宗盟  
莫二之地羣辟相維之尊屬舉鴻儀載均順福襲外事  
用剛之吉稽異姓為後之常特推茂恩予告有位推誠

保順同德協恭贊治崇仁亮節守正佐運翊戴功臣荆  
南淮南節度大使管內觀察處置等使開府儀同三司  
守太師尚書令兼中書令行荊州揚州牧上柱國荆王  
食邑二萬五千戶食實封一萬一千二百戶賜入朝不  
趨劔履上殿詔書不名元儼器範凝邈志懷淳暢連輝  
皇緒育德懿藩早膺無戲之封日為最樂之善茂分寶  
玉參擁麾旄官序百僚之師爵窮五等之貴雖游加殊  
禮獨冠寵名而居盈盈冲秉節彌亮率我宗裔保于燕

謀陽郊受釐端闕敷號眷言信厚之長宜廣陪敦之恩  
是用卽褒功之華增異數之稱衍采地于多邑優幹食  
于眞封克綏壯猷度越常檢於戲立愛惟始庸樹庇根  
之強涵澤既優滋同拜胙之貺國論惟允家情亦隆欽  
懷永圖以屏王室可授依前守太師尚書令兼中書令  
行荊州揚州牧充荊南淮南節度大使管内觀察處置  
等使荊王賜入朝不趨劔履上殿詔書不名加食邑一  
千戶食實封六百戶仍賜推誠保順同德協恭宣忠贊



治崇仁亮節守正佐運翊戴功臣散官勲如故主者施行

京東路轉運使尚書刑部員外郎直史館韓瀆可  
尚書兵部員外郎尚書屯田員外郎通判池州周  
咸可尚書都官員外郎國子博士知越州餘姚縣  
劉緯可尚書水部員外郎制

敕具官韓瀆等或茂材為郎或華蔭通籍瀆以帖職史  
館有將漕之勤咸以累課吏資有倅州之敏緯則積階

胄席假領縣章以年以勞並允遷秩今按中兵都隸及  
司川之職皆右劇也宜即授而寵之勉圖後庸無廢余  
典可

保慶皇太后叔母蓋氏追封榮國太夫人制

敕朕稽若邦猷輯和孝治因先朝淑德之輔正永樂徽  
名之尊禮既具揚恩亦惟厚追賁外戚率緣慈懷保慶  
太后叔母追封榮國太夫人蓋氏世德蘊靈女師蹈訓  
協濟中範作合令人盡潔志于祭繫流順教于家闈雖

景命近止而慶祚有開叙親中閨實曰諸母繫盛儀之  
允備宜先澤以載霧俾易舊封且光大國鈿釵增數湯  
沐衍封告于九京尚或歆寵可

皇叔荊王亡妻張氏可追封魏國夫人制

敕夫德高內助則維巢之詠興命或弗永則飾壤之恩  
篤矧惟近屬倏構冥災懿範未淪徽章有典具官荊王  
亡妻晉國夫人張氏華基茂緒淑操芳猷動合珩璜之  
音居遵圖史之誠早膺盛禮作配英藩躬婦順而弗渝

佐宗事而尤恪洊疏大國參緝寵儀方憑無遂之賢永  
贊維寧之盛何圖奄忽遽隔幽明生而有涯心焉增悼  
宜正名于寶魏且紆痛于幽泉密印鈿函尚茲歆服可

齊國夫人許氏進封晉國夫人制

敕竭誠均愛久則彌彰報德推恩厚而無斁齊國夫人  
許氏性鍾淑詰行服閑和早祇事于掖庭首效勤于甲  
觀克圖善育本出至慈忠存襁褓之辰譽訂山河之懿  
曷雖洊疏湯邑增衍國田酬推燥之夙功美居謙之令

躡質于舊典猶缺美名宜追保佑之力更益褒華之稱  
茲為異數無替冲猷可

故宮正紀國夫人郭氏追封尚宮制

敕宮正紀國夫人郭氏早鍾柔操參備後庭善服矩儀  
多歷時序寢服宮闈之秩游疏湯沐之封式寵懿猷遽  
淪徂景華聯有等遺範可懷特舉褒優尚慰冥漠可

典簿張氏進封宮正勾當大內公事掌絲李氏進  
封典言同知尚書省事御侍永樂縣君武氏進封

典寶落御侍御侍長安縣君王氏進封掌寶落御  
侍制

敕典簿張氏等婉孌自修禁嚴被選早奉宮掖之列屢  
更歲籥之華宜緣久勞稍遷秘掌益圖恭靖以對褒榮  
可

掌醞許氏進封司記聽宣許氏進封典言制

敕掌醞許氏等性服恭柔地承嚴禁克祗乃事無懈攸  
箴宜酬宮巷之勞進掌掖庭之局益思勤勉用對寵嘉

可

帥臣鄭守忠高化石元孫追封母制

敕乃者祇被陽郊別獻坤廟內循明發之感均愴靡依  
之懷矧余帥臣追悼慈育宜錫榮號以寵孝思具官姓  
某亡母累贈某郡太君某氏躬稟柔嫺踐循法度早奉  
金夫之懿實生雲將之賢志達五經任隆三衛慨鼎茵  
之弗逮追湯沐以游加及是展儀允當均福進啓郡田  
之數再紓予舍之哀緼禮襚章參詔冥漠可

御史中丞杜衍亡母追封京兆郡太君制

敕郊之報也均福以惠下推恩以篤親本孝慈之所從  
罄幽顯而率洽曰予端士參總憲綱緬懷劬勞增厚褒  
恤以爾具官杜衍亡母廣陵郡太君盛氏柔嫻其德溫  
靚其容毓慶清修之門來嬪良奧之室勤助賓祭輯和  
宗姻婉訓有基令子是似漸徙宅之教卒成善名副專  
席之求洊咨直質擢綠顧復之義屢延封賞之科及今  
相儀當用申獎繇淮海之奧徙咸鎬之都寶鈿芝函往



告幽窆可

入內侍省押班岑守素母進封郡太君制

敕具官岑守素母河南縣太君梁氏肇毓慶宗有行茂  
族早助金夫之懿入參貂省之華載服閨風遂流家檢  
實鍾令嗣列我信臣能豐祿以逮親屢賜田而啓邑且  
陳奏牘罄序孝心願從稱室之榮冀益封君之數嘉其  
誠慤進厥等威疏郡寵名循陔美志勉膺優渥永渙徽  
柔可

文思使知府州折繼宣母進封郡太君制

勸具官折繼宣母信都縣君劉氏稟和慶族作儷勳門  
曩勸義于金夫甫疏榮于石窳實生令嗣克襲先封道  
茂壺儀訓覃忠教方劭綏邊之績更張及養之勤瑞福  
溥均劬勞有請宜因本郡超正寵名且慰高堂之歡用  
光象服之等可

兩省妻封縣君制

敕朕乃者升禋紫宮麗澤南闕因考庸懋賞之典廣視

品從夫之封寵于朝倫寔有恩限以爾具官某妻某氏  
慶靈辨族閒婉飭躬資于多儀儷乃良士蹈無攸之戒  
既式爾宗助有為之賢方幹余蠱均禧在旦疏邑開榮  
姑命澤田之羞且光象服之數可

朝臣妻封縣君制

敕國家禮成陽郊賞均大令蓋由通籍而上更延及室  
之恩所以獎首公褒內助也以爾具官某妻某氏高華  
辨族幽閒賦質允服盛禮來嬪令人序陟廣朝之聯勤

經敏政之業迹其輔佐宜乃寵嘉俾開湯沐之封且光  
簪鈿之等可

帥臣鄭守忠高化石元孫妻進封郡君制

敕朕屬者謹郊報之常稽禮文之變茂對三后平施萬  
邦既敘臣工之勞復延伉儷之寵所以貴從夫而恩及  
室也具官某妻某郡君某氏慶靈辨族閒婉飭躬資于  
多儀式是良匹蹈無攸之戒既克家肥助有為之賢實  
參戎重均禧在旦增邑有常宜易郡田之封益光宗事

之懿可

御侍苗氏進封郡君依前御侍制

敕御侍苗氏早以良家入充近掖能蹈邕柔之範亟參  
進對之華備位小星方隆淑問啓封大邑宜寵徽恩往  
膺湯沐之榮益劭宮闈之訓可

入內都知王惟忠亡妻范氏追封郡君制

敕具官某妻高平縣君范氏憑後慶宗蹈和柔訓夙奉  
有行之禮載稱無遂之賢輔乃金夫列我貂省嚮酬勞

于侍幄亟延寵于封君懿範式彰冥災奄及眷邇臣之  
悼往宜卹禮之有加郡壤升名泉塗滲澤廡章渥數尚  
慰幽魂可

參政樞密母追封郡夫人制


敕朕乃者祇祓陽郊別獻坤廟雖陟配有序而明發載  
懷內忖孝心之虔實均子道之感爰因贊福咸及顯親  
以爾具官某母某郡夫人某氏性本柔明行兼法度始  
循婦德終繼壹慈擁有邇臣踐揚聯仕寢逮累茵之貴

已隔安輿之歡永慕所鍾賁章前渥訖茲大賚允若重封并賦賁于泉路慰乃棘心可

參知政事宋綬外祖母追封郡夫人制

敕夫尊賢于朝則儀品偕重延賞于室則封號並隆既穆人倫之端兼懷逝者之作所以篤家情而渥王澤也故具官王徽之妻故太原郡君王氏女德純茂世靈華衍早邁良匹協樹善猷繫天昌之能賢邁皇揆而稱首實荷先顧光服近僚惟時賜田已被柔壺永從如日之

誓終之克家之孤移祉外孫參我良弼具上前烈深軫  
朕衷方裒庸于舊臣宜均寵于齊體且因本郡特正順  
名廡章鈿函往賁幽窆可





元憲集卷二十六

欽定四庫全書

集部

元憲集卷

二十七至  
三十一

詳校官監察御史臣李陽祿

檢討臣何思鈞覆勘

總校官進士臣程嘉謨

校對官編修臣勵宇謙

謄錄監生臣路泰

欽定四庫全書

元憲集卷二十七

宋 宋庠 撰

內制

中書試戒風俗奢靡詔

聞夫古先哲王之御俗也皆上求天心下建民極天道  
貴質故敦本以體元民情易流必閑邪而制法然後能  
趨富壽之域開衣食之源至龢來臻大命無泛國家荷

三聖之業保萬方之大容典飭盡訓戒諄勤然而世道  
久夷人心多靡近聞中外頗僭典常自通邑名都世家  
豪姓競作浮侈迭相矜尚珠玉被于服玩緹繡裹于垣  
牆雕幾歲更規矩時易醬醢庖味山藻室廬靡嗟民力  
之勤罔憚邦儀之禁此而是縱孰不可容況曩者神宗  
親駕農祠示稼穡之重真廟深惜上幣嚴銷塗之律朕  
皆祇紹祖武奉行前猷惟爾庶邦敢忘茂訓自時以往  
咸俾改為儉輕蹈于匪彝當一施于重罰布告遐邇知

朕意焉

敕州郡勸農詔

昔者堯湯之災而民不病知備故也禹稷之盛而身服  
勞知本故也惟本與備一出于農哲王盡心義在于此  
矧去聖愈邈務本日衰非告以話言納之善道則懼夫  
懈怠之俗相靡而弗還富壽之期因循而莫復朕所以  
躬紹祖武親禮農祠御千畝之場越三推之數因以申  
勞狎野優復力田招來太和茂育羣品則號公諫宣之

旨賈誼勸文之戒朕雖不德庶或無慙而今春以來善氣猶鬱蝗羽為孽雨足屯膏南自淮楚而接之江東綿齊魯而著之海野之青草家無見糧丁壯輕去于里廬細弱相捐于溝壑會未周歲奄及大饑至于邦縣之間率寡京坻之蓄教不先具民亦何辜庸非貪吏以培克而奪其財苛人以趨辦而窮其力淫巧游惰者失其禁逮訊證捕者妨其時使吾赤子陷于饑寒嘉歲變于機青興言及此朕甚痛之況視民之勤禮存彛訓墾田罔

實漢有明誅自今以還其申勅詔條切督州郡凡令之  
出以農為先謹視土膏之宜明宣稼政之目諭以國家  
寶穀重食尊本鎮浮庶幾流亡有所底止敢或弛厥穡  
事重為民殃當一寘于重科俾大變于衰俗布告天下  
知朕意焉

舉遺逸詔

王者稽若大猷總制羣品曷常不求輔于有衆收績于  
無為張軒冕之華以來世彥厚丘園之禮以聘道真然

後教化尊于朝風俗清于野琮璫入于東序鸞鷟集乎  
西廡天無曠工祿必配德自淳政不競茲舉寢衰招延  
者罔汰于濫竽苟冒者希聲于畫餅使賢人志士穢世  
嫉邪蓄高韻于無聲韜奇文而滅彩築巖釣渭無復嗣  
音加璧裏輪遂成絕典寧所繇之殊路將可復而在人  
朕荷祖宗之靈託元元之永上惟大本非賢罔濟比詔  
執事博訪異人驚精鳴鶴之臯馳心白駒之谷歷祀綿  
久希風寂寥將朝廷禮意之未臻有司物色而乖當何



區域之大而賢才之寡歟抑又聞之蘭菊高芬多挺生  
于幽數隋和善價不自納于賈區緬惟高尚之蹤固非  
科級之致宣令郡邑深體眷勤其或求志于里閭抗情  
于丘壑樂篆素以希古葆孝悌而道榮有一于茲且以  
名上朕將敕公車之府備鵠版之書虛心望風待以不  
次庶幾皇士同獎大寧傳不云乎舉逸民天下之民歸  
心焉咨爾羣倫毋忽余意

賜南京留司文武百官尚書吏部侍郎知應天府

欽定四庫全書

元憲集  
卷二十七

四

韓億等賀南郊禮畢及上尊號受冊詔

欽崇報本禮重邦經刻玉崇號義緣人欲內循寡德忝  
舉鴻儀膺福享名心焉增愧卿近由丞弼方委保釐率  
屬罄恭露章馳賀味其辭旨忠恪兼勤欣歎之懷寤寐  
無舍

賜西京留司文武百官資政殿學士尚書吏部侍  
郎知河南府范雍等賀南郊禮畢詔

長景涓辰高禋措事獲膺純嘏還霈茂恩三靈交歡咸

與欣會卿屬司留鑰虔戒乃僚便道奉章旅辭致慶情  
文參允將順並照申閱于茲歎矚何已

寶元元年南郊御札勅内外文武臣僚等

夫一陽大報方冊彛規三歲親郊祖宗盛則朕猥以涼  
菲獲承基緒祇率丕訓茂昭前人兢兢業業罔或寧暇  
賴上穹鑒祐列聖保綏方隅晏然氣物時若民微艱食  
之阻邦輯阜財之經嗣洽太和莫非靈貺雖復犧幣有  
品染茅載蠲申勅祠官謹修歲事然齋輅停軫欽柴輟

熏弗躬于行撫已成闕祭疎則怠心焉增惕矧紫營在  
望奚敢憚勤黃流並裸庶幾能饗爰諏景至之吉恭迓  
帝臨之休慎舉鴻儀式先誕告朕以今年十一月十八  
日有事于南郊咨爾攸司各揚乃職凡所以供調毋黷  
典常應諸道州府不得以進奉為名別行科斂裕神約  
禮稱朕意焉故茲札示想宜知悉

賜參知政事程琳生日生餽詔

任參丞弼業總謨明出入再期周旋一德嘉聞誕日宴

啓世祥毗倚甫隆寵頒惟舊餼醪具品麴粢兼儲往資  
合族之歡姑慶生賢之會所宜欽荷以對同寅

賜參知政事王鵬生日詔

志局堅明材猷肅給鄉筦斗樞之重移參鼎餼之和碩  
畫所經大倫並輯眷言異稟實紀初辰嘉賢運之有開  
宜恩頒之載渥樽醪且旨庖犧具將用昭禮食之華姑  
集家庭之慶體余注賴往洽燕私

賜知樞密院夏守贊生日生餼詔

盟府舊勲樞庭新望高猷伊始備賜惟常矧秋籥之孟  
辰紀慶弧之善旦特推蕃錫且志同寅往洽宴私諒欽  
眷待

賜知樞密院盛度生日生餽詔

寵分齋鉞職筦朝樞動成密勿之猷居然俊乂之老生  
賢胥會紀旦有初方寄同寅固存異數牽醪腴旨麴粢  
精良併資宴豆之華且慶門弧之吉允宜欽荷用對眷  
懷

賜知樞密院王德用生日生餽詔

識洞武經世資忠槩能荷旗常之伐進參帷幄之謀造  
膝有猷慎辭無玷臯茂疇于久識凡再易于中權命數  
益隆志懷彌劭眷言異稟實紀初辰朝有慶儀禮兼飫  
賜稻麴鑿品醪餼叢滋俾均合族之歡用志生賢之會  
所宜欽受且表眷勤

賜同知樞密院陳執中生日生餽詔

茂承世範參筦朝樞年序未淹風猷載洽眷言異稟式

紀初辰宜昭侍幄之華追慶射蓬之會芳樽和旨庖具  
珍盈姑示眷慈往欽蕃錫

負荷世猷彌綸機政迹乃生賢之運協余同德之休適  
及誕辰乞昭慶物樽華芳旨庖齋珍腴往申宴豆之歡  
且志門弧之吉體茲眷獎用克欽承

賜宰臣張士遜生日生餽詔

弼直宏才謨明舊老允服賚予之命實基生甫之祥曾  
是季秋挺茲慶日拜儀有典賜品惟優宜因宴具之豐



尚續壽祺之永往欽異數用表同寅

賜武成軍節度使同中書門下平章事駙馬都尉

柴宗慶進謝賜生日禮物馬詔

卿姻近之華藩宣有寄鄉屬始生之旦用申蕃錫之恩  
仍俾乃宗具將予好寵賢惟舊疏懇載勤仍效右牽之  
良參抒中藏之感虔劬適禮愧尚交懷

賜鎮海軍節度使新授知樞密院夏守贊赴闕沿

路茶藥詔

卿甫膺節召入總機繁念稱娖以戒塗屬炎歆而在候  
方滋渴竚宜謹綏調特命輕軒往頒茗劑所宜欽受姑  
表眷懷

賜契丹賀正旦使蕭傅到貝州茶藥詔

卿奉將隣幣來慶王正肅邦禮以惟虔驚使程而匪懈  
眷言次舍式戾方州不無鞅掌之勤宜有綏調之助特  
推優錫用集至和諒即欽承且昭恩賚

賜契丹賀正旦副使韓志德到貝州茶藥詔

卿遠服使聯參修聘範款邊關而遐右冒歲律之淒凝  
緬是勤斯軫于勞止雜頒靈品助擁時休宜體眷懷即  
當祇荷

賜契丹國信使茶藥詔

肅持命節祇達朝言冒暑于行念勞云久夙宵良苦調  
衛宜先特申藥茗之頒參資湯液之品祛煩蠲疾尚諒  
眷懷

賜淮康軍節度使同中書門下平章事陳堯佐加

恩誥敕詔

卿儒苑上才槐階舊老茂分旄節陪我寰畿屬郊事之  
方竣冀靈休之普洽持敷明命參寵元侯具刻贊章往  
榮藩屏仍俾家庭之嗣奉將詔版之嚴萃厥恩私所宜  
祇荷

賜尚書工部郎中天章閣待制知同州司馬池為  
澄城縣百姓党岫持刀刺殺親叔依條斬訖待罪  
特放詔

漢輔要邦秦餘舊俗化條所被恩種宜悛何茲悖德之  
氓靡率懷音之教毒加親序汙我人倫卿適莅郡封載  
欽官獄恥聞凶類尋正嚴誅閉閣示愆露章引劾願任  
吏師之責益彰臣禮之恭觀過有來省躬奚咎勉興善  
政以牧吾民

賜資政殿大學士尚書左僕射判鄆州王曾乞南  
郊陪位不允詔

卿儒苑上才公槐雋老冠名秘殿均逸東藩雖挹道均

冲而協恭無懈屬升禋之誕告遽刻牘以斯聞願肅朝  
鑒旅陪祠鬯然坐堂之政甫慰氓謠擁傳之勤重煩耆  
德宜輟甘泉之從姑紹潁川之良其在傾輸徒增歎矚  
賜鎮海軍節度使知澶州夏守贊乞南郊陪位不  
允詔

卿以擁節之嚴守夾河之重茂宣民政總訓師和有鄰  
疆餞勞之煩有隄事繕完之備實惟勲舊鎮乃要衝會  
郊報之在辰覽郵封而瀝懇願陪盛薦深體忠懷然職

在刺條地陪宸服宜切圭符之寄用紆朝宿之勤其在  
歎嘉靡忘鑒寐

賜武成軍節度使同中書門下平章事駙馬都尉  
柴宗慶乞朝覲上壽不允詔

卿皇室近嫺重侯茂閥早持帥節兼視臺華擇分陝之  
名區寄屏周之良翰會余慶節遽刻奏封願飭介圭之  
朝因陪壽聿之獻誠雖輸嚮禮實重煩況任貢已列于  
前撫封方倚于外宜綏閭政昭副朕懷眷是寅恭靡忘

嘉歎

賜刑部尚書知徐州李迪乞赴闕上壽不允詔

勅李迪省所上表乞暫赴闕隨班上壽事具悉卿久服  
蓋臣洊持魁柄鄴當周衰之重移殿徐邦之雄克布惠  
和以式方面雖甘棠流詠于陝服靈河蒙福于漢京樹  
善相均配古無愧屬余誕節時閱奏封願集奉觴之辰  
且紆戀闕之志然倚矚舊老倡率守麾風化所期內外  
惟一無煩趨覲姑穆翰垣恭愛之誠歎賞徒切所請宜



不允故茲詔示想宜知悉夏熱卿比安好遣書指不多及

賜護國軍節度使兼侍中張耆乞朝覲上壽不允  
詔

卿倡牧元侯登樞舊德繼開大府實冠友邦屬我誕辰  
願陪慶會雖奉觴攸竚而趨節為勞姑穆翰垣式符眷  
賴輸誠循禮徒用歎嘉

賜河陽三城節度使楊崇勲為移知陳州乞朝覲

不允詔

卿早秉戎旄屢綏藩政民謐載路歲筦亟淹鄴因宛道  
之夷後徙淮陽之守隱然屏翰陪余京師遽閱囊封願  
先載觀眷心存之雖切顧外倚之有初無煩造朝且重  
分閫

賜西平王趙元昊詔

朕奉承端命撫有萬方上席祖宗之謀靡佳兵革之舉  
專任德教以統華夷推心信人自謂無負卿世懷恭順

名冠翰垣嗣享王封守我西土朕不矜官爵之貴不吝  
祿秩之優任倚中權寵均同姓關市交易行李無猜貢  
獻頒分道路相屬則朕之恩信卿之款誠稽于大倫誰  
得為間今乃遽形表疏輕述偕差且將徇過分之謀舉  
非常之號冒陳世系輒改歲元省閱再三嗟惋何已寧  
朕之寡德不足以懷來將卿之失圖自成于迷妄事無  
萌隙何及于茲況自乃父以來盟書可復今畧陳大要  
以曉爾心且卿父誓表其略云臣立誓之後若負恩背

義百神怒誅上天震伐使其殃禍仍及子孫此表見存  
藏之故府卿之先父卒保斯言故能高朗令終功業相  
襲福之所庇理則宜然今卿忽此背馳了無所據壞爾  
考之約孤本朝之恩忠孝兩虧今古為恨揆之王法所  
不忍聞自卿表之來內外咸憤然朕獨排羣議深惜舊  
勲恐卿惑左右一時之辭非英傑本懷之欲人誰無過  
事猶可追倘能去尉佗越帝之名復吳芮漢庭之令洗  
心嚮善改往懷昔則朕之待卿曠然如舊永紹世祿長

為國藩變通之機不竣終日去就大分其審處之所進  
鞍馬駱駝並卻付來人牽回爾其戒已往之愆復將來  
之善則永世無窮矣故茲詔示想宜知悉

賜西平王趙元昊為賜差來人見辭例物詔

卿志凝忠概世繼武勲保障有勞恭亮彌罄比余誕日  
首率貢儀差駿產以斯材旅慶琛而有煥仍嘉親校能  
恪朝規既閱右牽之良特渥匪頒之數且昭恩賚并寵  
藩維永念傾虔尤增歎尚

賜振武軍節度使知延州范雍充鄜延環慶兩路  
沿邊經畧安撫使詔

卿幹棟名材籌帷舊望自付擁旄之任即臨乘障之衝  
叢爾狡羌忘我前施陰連種部規擾塞垣雖購募有科  
而威防難廢再念詰努控遏之會安化經營之方節度  
素分綏懷莫一斷于朕志合乃使名按瑣序勞繁卿為  
重已申朝命馳錫詔書俾蚊蚋暴集之辰有兔犬指縱  
之地宜欽異數益講武韜內安屬國之民外殄反常之

犯稱余遠畧遲乃茂勲

賜奉寧軍節度使就差知涇州夏竦充涇原秦鳳  
兩路沿邊經畧安撫使詔

卿望映民宗謀參王體頃從樞幄之舊移陟師壇之崇  
出鎮三秦並護諸將而叛羌各種狡穴野心竊號背恩  
游魂伺隙比雖申嚴邊鎖換補將屯然自平涼以東隴  
道交屬建防制要當在臨涇慮烽燧之警秋或狂狡之  
送死必先威禦以便指縱余心念焉無易卿者已頒成

命即俾改轅特新使號之華再襲戎鈴之重仍令兩道  
同稟善經綏御所資等威皆絕宜欽慎選毋或憚行勉  
壯厥猷用恢西畧

賜置勒斯賚詔

近者夏州僭逆元昊孤背朝恩竊為僭制已詔有司應  
元昊在身官爵及所賜舊姓並令除削訖卿性資忠勇  
世嫉仇讎得此布聞諒增同憤然恐元昊恃其凶狡妄  
肆侵凌卿宜先事為防因機伺便整揚勁騎率勵衆心



或躡其空虛出其不意以時掩擊殄滅醜徒助天道之  
禍淫成王威之禁暴則崇名厚賞非卿而誰勉建殊勲  
副余外禦兼昨者里玻默里烏進奉到闕言卿有男轄  
戩瑪克占覺二人特以卿故並授團練使仍支請受續  
據秦州奏得卿文字知轄戩等各往宗噶爾城并蘭州  
住坐兼言道不與元昊往來如元昊入漢界兄弟二人  
將兵殺截此蓋卿從來一心向國致轄戩等如此忠孝  
況卿父子至親義須和協與卿同共掩殺僭逆元昊勿

落元昊姦便別致間諜誘引

賜中書門下詔

昔苗民弗懷首罹虞竄邳支自立終伏漢誅蓋犯順者  
無赦于國章除殘者罔限于夷服炳焉通誼疇或敢踰  
趙元昊戎漠餘妖邊關小種性含虺毒志負狼貪昏頑  
表于稚年傲悖成于壯齒曩者德明卽世西控哀悰朝  
廷錄守方之忠憫稱嗣之禮拔于童豎付以節旌名襲  
眞王寵視同姓金絮有秩絳繹以周其窮關市弗譏貿

遷以通其貨假我明命取重諸羌固宜竭犬馬之勤効  
涓埃之報克守先業以稱大恩而乃背惠反常毀忠蔑  
孝僭舉國號扇惑蕃渠跳梁井蛙之涯旅拒秋螳之轍  
公遣軍校冒服使車列牘自陳欺天罔畏既彰逆節合  
舉明刑朕深憐舊勲特加涵覆橫遏羣議密賜手書貸  
其方命之愆開以自新之路護送來介俾還穹居庶遷  
善而革心終恃遠而迷復至敢驅率醜隸攘竊塞民騰  
布文符誘誑區落而朝廷列奏邊吏抗辭願舉偏軍往

平狡穴促梟稱亂之首以正不庭之辜朕再念一夫肆  
狂餘衆何罪況元昊脅從濟欲濫殺逞威名酋外奔諸  
帳懷貳苟戈鋌並縱則玉石奚分且俾列于購科止用  
取其魁惡其元昊在身官爵並令削奪仍令宗正寺除  
去屬籍惟彼諸部素奉本朝迫此奸兇遂成誑誤倘能  
結黨歸義執賊效功必當昭洗前汚申明厚賞國有信  
誓煥如丹青應賞募科格並委中書門下詳為條件以  
時播告俾體朕懷

夫政平召祥化缺生沴推精盪祲其猶影響故王者遭  
異而思德省已以及人交修治綱仰答靈譴朕雖寡昧  
敢忘斯舉比者善氣弗效陰沴屢臻坤體震于冬藏雷  
音發于春孟邊關民舍被害尤若是用臨朝嗟惕馳使  
撫綏推咎以咨讜言協恭而戒臺宰冀獲愆謬庸克振  
除尚慮幅員之遐不無官守之衆其間或吏貪而弛或  
教虐而苛或狴牢有滋豐之煩或賦徭有輪調之急或  
受賕鬻直使下情壅于上聞或隱災逃負使醲恩隔于

周決或世償逋折巧避赦原或歲嬰呼擾猥妨農作一  
物失所太和用虧朕念共斯責者外則有使轂按巡之  
司次則有藩條守長之任率荷優寄當體至懷苟前弊  
之尚存宜悉心而司草庶迎美應用治重熙凡厥具僚  
無忽余誠

夫至公之行則淑慝咸辨私議弗禁則風俗易偷朕躬  
攬權綱茂綏政治每觀邪正之辨思寄誅賞之中庶臻  
大猷以止多辟而士類至廣材品或殊久服涵養之仁

寢成黨與之弊至乃挾朋相援奸利自營驅扇颺塵混  
淆朱紫託狂辭而市直結陰好以濟仇章交公車聲布  
行路使濟濟羣讓有愧堯人之封翕翕煩言更興周雅  
之刺永惟澆競良用懲嗟若夫委質事君協恭宣力思  
無出位是曰守官和異于同固當擇善況朝經式序仕  
次有階因行察言緣名責實苟存忠潔自致顯榮何必  
舍爾夷途蹈于險轍釣名汙行觸禁投愆宜內訟于乃  
心毋亟傷于至化尚安所習國有嚴科凡在搢紳明體

予意

王者稽若大猷總制九服曷嘗不寄治于守宰責效于  
監司職焉相維命乃無泛朕奉承景業流觀往辟知仁  
壽之本以政教為先故咨求羣材綱紀衆務察州有等  
字邑有員建漕部以謹民財馳使詔以糾邦獄委屬偕  
重休戚與均保乂之方數路而已固當上體勞疚允迪  
惠和使鰥寡無恫怨訟咸息沐浴至道臻乎太寧今則  
不然吏文多端而貪殘日滋民生孔勤而奉養多乏愁



歎未能盡訴囹圄不以時虛感動陰陽延致災眚朕雖引慝自咎申誠博謀眷爾多方之臣得無曠位之責自時厥後宜惕攸箴班條者企循良之風擁節者勵澄清之志刑罰則寧寬而無濫徭役則量力而勿苛任百里不可以自輕效一官不可以懷苟率我王度以承天心尚或勿虔罔有攸赦布告中外知朕意焉

賜外任臣僚進乾元節銀絹詔

孟序乘離誕辰著令爰率邦儀之舊載均朝享之歡卿

恪奉彝章遠祇慶集聿馳任土來侑稱觴眷旅實之珍  
盈驗祝延之悃慤永言歎尚無捨于懷

賜外任臣僚進乾元節功德疏詔

慶序祝延邦儀著令卿發于忠愛申以齋明集方外之  
勝緣歸我辰之茂嘏仍因淨範虔疏寶題駢軸相輝通  
郵來上具體贊揚之盛益昭翰戴之勤省閱于茲眷稱  
無斁

賜振武軍節度使知延州范雍進謝賜牌印月俸

公使錢到任馬詔

卿近擁軍旄往司戎索爰錫印符之重兼資泉廩之豐  
人爵所班邦恩惟舊遽披謝牘仍效名駒敷感載勤靈  
誠彌懋永言率禮茲用欽懷

賜奉寧軍節度使知永興軍夏竦進謝賜牌印月  
俸公使錢到任馬詔

卿乃者繇天臺之聯膺戎閫之重特頒節傳詔刻印章  
惟鍾官月廩之豐逮侯邑餐錢之舊並循邦令參寵使

權署政有初需頭來上曲條謝禮併效駿驅永念忠懷  
實深嘉歎

賜外任臣僚進端午馬詔

朱夏適中端辰協午肇于嘉節實紀慶儀遽形輸貢之  
華遠集效牽之駿勤誠有底累歎無忘

賜諫議大夫張意進謝恩馬詔

卿久服吏資近充諫列侃然華皓允矣甄升閱感敘之  
盈章復效牽而致禮恭勤所集歎尚兼懷

賜諫議大夫俞獻卿進謝恩馬詔

卿頃緣最狀序陟禁曹方寄守麾已蠲陞謝飾駟來效  
禁禮載虔益驗傾輸良增嘉尚

賜諫議大夫盛京進謝恩馬詔

卿績著藩條望華朝禮鄴繇卿列進序諫曹霈澤有初  
露章申感仍效斯材之乘允將由禮之恭載閱勤誠但  
增嘉歎

賜外任使相節度使進乾元節馬詔

震誕之辰允刊彞令官司罄祝申侑至虔卿位服宗工  
勲宣名翰樂聞慶會祇率邦儀遠效舞駉之良入欣充  
庭之品愛心所底貢禮斯華言念傾輸彌增眷矚

賜彰信軍節度使同中書門下平章事王隨進謝  
到任馬詔

卿頃罷政機近綏侯服星言之部時克偃藩屬宣布之  
涓辰序恩勤而累感效茲阜駿絢乃庭儀言念寅恭益  
深嘉矚

賜護國軍節度使兼侍中張耆進謝孫男恩澤馬

詔

近以均錫鴻禧就蕃榮數仍眷抱孫之愛復推延世之恩率是寵章抑推襲制遽陳函奏兼效厖駮感敘過周歎嘉無斁

賜淮康軍節度使同中書門下平章事陳堯佐進謝差男押賜加恩告敕生日禮物及孫男恩澤馬詔

歸以茂加勲策追慶門弧並因子舍之歸即寄使輶之  
寵屬推世賞施及孫謀雖命數載蕃而等威斯協需頭  
來上駿足效牽過敘感惊有昭邦禮貢輸為費歎想交  
懷

賜龍圖閣學士尚書工部侍郎知并州杜衍進謝  
恩馬詔

朕羈者親選舊勞就嘉秘職仍屬綏邊之重且資訓俗  
之方眷此序升詎煩過謝駿良來效悃悞具將永念忠



勤靡忘嘉矚

元憲集卷二十七

欽定四庫全書

元憲集卷二十八

宋 宋庠 撰

內制

賜且勒斯賚男轄戩勅書

勅轄戩省秦鳳路部署司奏據汝將到蕃字譯作漢字  
稱汝告秦州部署諸官員自家要抵敵草寇便各往宗  
噶爾城並蘭州住蕃漢兩家往來道不與草寇往來如

有草寇兵士入漢界來時自家兄弟二人將兵士殺伊  
草寇事汝款塞踰誠舉宗效順奉宣王畧式遏邊虞憤  
狡寇之陸梁謀成師之犄角忠懷壯節朕甚嘉之然汝  
兄弟既奉朝廷即須父子和協盡心孝順和為一家使  
出兵之時手足相應同殺僭逆元昊斯為上計勿聽姦  
人間牒今賜某物至可領也故茲獎諭想宜知悉秋涼  
汝比好否遣書指不多及

賜彰信軍三軍將吏僧道百姓等為授王隨本軍

節度使示諭勅書

朕以王隨時棟名材公槐舊望比付宰司之重頗成歲  
績之勤而屢控讓情懇辭大任重違謙慙特峻等威俾  
改陟于齋壇且兼榮于鉉席眷惟戎節近制寰畿陪余  
京師式是侯服雖未臨所治而遐率懿綱繫乃軍和之  
嚴暨于州里之衆邁茲賢帥良愜爾瞻固當善稟教條  
仰承威惠增崇藩屏稱朕意焉

賜定國軍三軍將吏僧道百姓等為授王德用本

軍節度使示諭勅書

夫擁旄授律以獎戎昭疏藩疇祉以屏王室諒非舊德  
疇負寵名朕以王德用忠族世勲壯猷亮節早階勇爵  
幹我近司綢繆萬樞陟恪三接嘉其匪懈之力易以中  
權之雄宅是左馮屏厥西夏雖肇頒于新節且留掌于  
煩機眷乃翰垣底茲威惠所宜率籲衆志欽服化條同  
底大和以奉賢帥

賜交趾郡王李德政甘州可汗王伊噶格勒雅蘇

歷日勅書

朕祇仰乾經順修時訓每緣命朔必謹頒常卿詔服世  
勲協寧邊略屬歲元之更序資玉歷以布和宜克欽承  
用符恭授

賜五臺山十寺僧正圓凝等新進功德疏勅書

靈山奠方西聖儲瑞聿為寶所以佑中區眷爾苾芻之  
流參軒迦藍之重每緣新歷茂集勝因歷讚誦之寶題  
形熾昌之善祝傾虔有素歎尚無忘

賜元州舒延金進奉謝賜真命官誥及加妻母邑號勅書

汝祇稟朝威保寧徵候鄴寵州符之號特頒臺詔之文遽達貢儀罄紓謝臆永言恭順良切嘉稱

賜右屯衛大將軍昌州刺史承裕左屯衛大將軍封州刺史宗顏進和御製讀三朝寶訓詩獎諭勅書

洪惟列聖參建大猷至訓睿謀充圖溢牒曩緣約史申



命記言屬茲講藝之餘將度布策之覽永懷先烈因抒  
短章仍示宗支用均燕翼汝地連昵屬天賦雅材唱韻  
甫頒奏篇俄上匪徒挾藻之麗實具然其之能秀茁若  
斯勸慰何已勉脩素業終稱茂親褒善最成吾意偕極  
賜知府州折繼宣放罪勅書

汝世荷朝恩任優邊瑣凡該郡正合稟公規覽使者之  
勅章列部民之訴牘悉條違冒粉有端倪雖涉交仇而  
理須置對審如訟狀當正刑科朕以汝忠順之門勤勞

固圉方期來效構此煩言良用軫嗟特從矜貸然國章  
不可屢屈更議難於再加爾當念舊省躬棄污履潔心  
無憚改日以自新上續弓裘之勲勉訓山藪之施保名  
全節可不慎歟

賜溪洞刺史等進乾元節水銀端午綿細勅書

慶節稱觴嘉辰角黍汝保寧遐徼欽率彛章任土達誠  
效珍有品眷茲順恪深用歎嘉

賜乾寧軍兵馬監押右班殿直趙化明勅書

勅趙化明省河北轉運使奏准密院劄子令乾寧軍勘  
會保明到汝的于正月一日親自部領軍員兵士往軍  
北蔡家庄鬪敵殺倒賊頭五人全火當同者詳委是  
詣實事汝禁庭隸職軍壁董戎能率蒸徒往擒寇孽厥  
官斯舉編戶用安言念忠勤良深嘉尚故茲獎諭想宜  
知悉

賜五臺山僧正法震等勅書

勅五臺山僧正法震等省所差副僧正兼真容院供養

主英惠大師賜紫廣洎進新正功德疏到闕事具悉  
彼名山素嚴真像屬茲獻歲廣集勝因奏疏以聞精誠  
可諒宜加賜予式獎恭勤今賜廣洎紫僧衣一對絹二  
十足故茲獎諭想宜知悉

賜知唐龍鎮殿直來守順勅書

勅來守順省所差人管押進奉乾元節并告家闕及直  
進馬共四疋事具悉汝率職居邊輸忠奉國爰效右牽  
之貢仍傾無隱之誠言念恪恭尤增嘉尚特推頒賚用

示眷懷其所進馬今依估價迴賜錢七十九貫文所有  
告家闕別賜銀一百兩並交付差來人至可領也兼賜  
差來教練使任璘王受郭海各紫絁衫子一領錢三貫  
文故茲示諭想宜知悉

賜祠部郎中知河南府陵臺令兼永安縣趙世長  
勅書

勅趙世長近雨水衝注奉先橋汝部押兵士救得本橋  
事在昔先皇恭朝陵寢跨茲溫洛肇建輿梁比淫雨之

載零伊衆川之交注汝克勤障捍訖免牒推言念勤勞  
豈忘嘉尚故茲獎諭想宜知悉

賜尚書兵部員外郎知壽州梅詢勅書

勅具官梅詢近草寇竊發汝擘畫捉賊人物安居事壽  
陽劇地東楚奧區控引淮淝表裏瀉霍逋逃所聚剽竊  
寢多疇汝幹材付之郡職果有方畧屏茲寇攘枝黨悉  
擒巢穴皆覆省司官之奏列知編戶之乂安載嘉乃勞  
深副予意

賜杭州天竺山傳法住持僧文勝勅書

敕杭州天竺山傳法住持僧文勝汝早悟上機素推重  
德近茲京輦肇建禪宮已徇羣情爰命促召將廣安于  
法衆式闡真乘宜束戒于輕裝副茲寵待故茲示諭想  
宜知悉

賜馬亮進乾元節絹勅書

勅馬亮省所進奉乾元節絹二千疋事具悉卿爰以能  
材往分外寄載登厥貢克遵任土之規來慶誕辰深諒

愛君之節度恭可尚嘉歎寧忘故茲詔示想宜知悉

賜知舒州洪鼎勅書

勅洪鼎省所進奉新茶一銀盒事具悉汝輟于學館往  
布郡條懿彼名區育茲嘉莠能採掇而來貢應氣序以  
惟新言念恭勤良增歎尚故茲示諭想宜知悉

唐龍鎮勾招鞍馬空名敕書

汝部族推榮忠勞夙著惟邊疆之頗邇聞良馬之素多  
能選權奇入充貢獻必頒善價用獎純誠



府州勾招鞍馬空名勅書

勅國家務推恩信遠示招懷聞彼邊陲素多良駿儻獻  
輸之來效固誠禮之可嘉其在賞酬必令優厚勅書到  
日汝等可多將三歲以上十歲以下堪勝帶衣甲壯嫩  
好馬赴京進貢候到日支賜茶酒錢及厚給價直已指  
揮經過州縣館驛支給熟食草料如法供待務在豐盈  
故茲示諭想宜知悉

賜知代州趙日新進黃金鍍銀硃石火匣勅書

完石含溫良工賜巧熾然備用鈎飾均華會此淒凝之  
辰修厥藝常之獻勤恭所至嘆尚無忘

賜知廣德軍龔會元進先春茶勅書二首

惟厥苦茶冠于常卉薄言采擷來效貢輸矧屬誕辰  
且先方物服恭脩職併用稱嗟

江楚之區茗薈攸產陽膏其動露藹載萌擷芳管以  
先期襲采緹而效貢傾勤有恪嘉尚無忘

賜知光州郭昭昇進新茶勅書二首

土毛之繁茗品尤上先春效味輸貢有經眷乃摘山之  
勤加茲于橐之密罄恭謹職併用稱嗟

茶品之英淮區攸產當新陽之盈債先百薦以萌滋著  
厥貢條是為方物逮此甘芳之薦弗違采擷之期言念  
恭勤良深嘆矚

賜知豐州新授侍禁王餘慶進謝恩馬敕書

鼎寵邊勞序遷庭侍遽緣恩推來效貢輸服卓惟良  
賜金有品逮于給使咸俾霑齋深諒爾忠當體余眷

賜冀州刺史趙翰階州刺史張重德進謝恩馬勅

書

汝以職勞茂膺恩數眷獎功而甫爾遽列感以勤斯爰  
效駸牽且將謝意恭虔所底歎愧良深

賜石州安慶府都督康興進乾元節馬敕書

慶節在辰庶邦效貢汝世承邇扞勤稟朝規遠輸牽右  
之良來集祝延之會永惟忠恪深用稱嗟

賜新授崇儀使李士彬進謝恩并乾元節馬敕書

增秩懋勞抑惟公賞祝延上慶茲乃忠懷繫廐駭之竝  
將顧庭儀而有恪恭誠順節歎矚兼深

賜殿前都虞侯劉平進謝到任馬敕書

卿輟自衛廬往來邊壘訓齊甫爾感叙勤斯載閱右牽  
之良彌昭中蘊之恪眷言嘆矚無廢于懷

賜潞州安慶府都督安美等進上尊號馬勅書

朕鼎迫羣情紹加徽冊繫乃心之忠順樂朝慶之光華  
遠效名駒來參貢物然載驅多費平估有貲且錫貨緡

用酬駿產仍推恩例並獎使勤其在歎嘉弗忘于意

元憲集卷二十八

欽定四庫全書

元憲集卷二十九

宋 宋庠 撰

內制

賜文武百僚上尊號不允第一批答

夫號惟表功名不浮實休有前誠是謂至公朕以眇眇  
之身託元元之上負荷淳烈適駿大猷持盈載勤燭理  
猶昧日慎一日弗遑底寧幸屬中區之和將躬吉士之

報揆乃冬序布之先庚恤祀有初克已彌勵而公袞四  
近官師百工繇朝逮鄉自夏而裔咸一厥慮颺言于廷  
願因拜貺之成益余建顯之數省閱于再良用憮然矧  
曩徇羣心游膺丕稱準文配義已多慙德今又徵祈福  
之會崇溢美之聲神聽惟聰禮典將黷齋明抑畏其若  
是乎徒嘉乃誠毋重台責

第二批答

朕邇以郊報之嚴邦體攸重親率厥典誕告羣倫方將



勵抑損之誠保齊禘之戒嘉與三事庶尹共遵斯路率  
志盡物以優裕于神祇底無怨恫用迎貺施則朕之精  
懇宜諒于朝乃今中外之情愛戴弗已因時熙事增我  
號榮連章叫閭至于再請諭而未卻茲愧于懷且禮繁  
者易敝于文名高者難副以實矧斯薦信安議重華罔  
固溢言徃順前指

第三批答

朕奉承先猷日儆端命獲事上帝于茲五郊特以方隅

靖嘉犧齋蠲碩樂與羣執同歲盛儀不謂官師率和奏  
牘連委冀緣瑞福之集增列號榮之崇荐諭至懷俾停  
過舉而億兆歸美右席均誠叩閣竚命固期開可朕參  
慮夙夜審處情文不有所俞曷符爰戴之切不有所避  
奚表抑畏之恭若乃實用善元易冠丕稱是惟勗德匪  
曰名功襲用舊章差或無愧至于英睿之烈后辟罕兼  
未實而居省已胡益矧歲序之遞變肯屢臻宵舍舛期  
坤載愆靜責躬念咎已布于詔書盡誠恤祀方祗于天

戒遽加徽顯是黷齊明宜損溢言之華姑循舊物之典  
去彼取此欣腴兼常其所上新號內英睿二字宜不允  
餘如所請候郊禮畢日受冊

賜荆王賀加上尊號受冊批答

朕屬者徇外朝之請崇徽稱之華甫畢裡燔遂膺榮典  
內循溢美兼用建元覲然祇受良璫夕惕卿茂親明德  
聿隆褒愛雅辭徹奏首罄寅恭表率友藩尊奉王室申  
味情旨歡愧兼懷

賜門下侍郎兼兵部尚書同中書門下平章事張  
士遜讓恩命不允批答

朕頃度郊報慎講禮文實倚台司總宣使範肇于膺款  
訖乃熙成謀猷所咨陟降咸若褒功胙土恩冠于朝誕  
告之辰師僉允協夫何冲遜猶爾控陳且名器天下之  
公股肱君體之一卿而弗受誰復宜居宜畧常謙往膺  
盛典

賜荆王讓恩命不允批答

卿屬冠宗支地尊藩輔禮無與二恩所當先惟是嚴禮  
介于繁祉覃為慶賞實首親賢明制誕敷朝言允恊何  
圖謙慙再列辭情雖高讓可嘉而至公難廢宜循茂典  
即斷來章

賜知樞密院盛度讓恩命不允批答

卿以蠲吉元辰紹修祭祀繫卿舊老相我盛儀禮備福  
臻此焉同慶華階茂爵允矣疇庸而乃稽命至公徇高  
一已過敷讓懇將廢藝章收汗出綸所繫尤重宜遵往

受即副虛懷

賜參知政事王巖謙恩命不允批答

朕屬者躬被嘉壇獲成鉅典歸臨端闕大省羣生實賴  
左右之臣罄宣協贊之力無德不報慶賜遂行參質寵  
章允穆朝論讓封來上謙渠頗勞然信賞勸功之先徇  
高行已之細我方懋德人孰顧私當體虛懷無淹徃受  
賜參知政事李若谷讓恩命不允批答

卿早服忠謀預聞幾政屬余裡類實相齊明勤與體俱

北緣誠報受釐之始均賞攸宜遽閱奏函過形讓懇夫  
疏封取貴褒勸大方潔已辭豐踐修末節矧情成命已  
布公朝當廢循牆之私即虔渙汗之拜

賜寧江軍節度使允讓讓恩命不允批答

卿屬懿地尊器韶韻遠秉旄戎閫司籍帝宗擢展陽郊  
之儀參奉上公之獻助余介祉時乃之勤竣事布恩寵  
章惟舊猥形撝遜未即往俞況定命已行公言普協宜  
回冲執時對茂恩

賜保寧軍節度使駙馬都尉王貽永讓恩命不允

批答

卿早服近端見推賢帥屬余裡類專倚微循亦既均禧  
早焉進律質于公賞孰不謂宜而過執沖懷尚留成命  
安得徇茲崇讓虧乃懋功盍廢謙私徃膺蕃渥

賜殿前副都指揮使寧遠軍節度使鄭守忠讓恩  
命不允批答

卿擯執親喪奄踰禫祭雖義從權奪畢舉墨線之文而



官有舊章宜還艾綬之品仍緣褒數進衍戶封式示賞  
勞詎為躡等遽茲冲避深體謙勤然命出成綸恩無收  
汗即虔往受母復牢辭

賜宰臣張士遜讓恩命不允批答

卿早服宗工淳同宰政式布揚庭之命且光圖舊之恩  
方佇延登遽形謙遜體余慎簡當廢冲懷今差入內內  
侍省內東頭供奉官梁懷志賜卿讓恩命不允批答想  
宜知悉

賜宰臣章得象讓恩命不允批答

卿曩服食俞贊圖省密嘉有勞于幾事俾移燮于大鈞  
方佇延登遽形冲避讓牘再聞寵章猶鬱適圖亮采無  
遂終謙

賜知樞密院王德用讓恩命不允批答

卿總司樞務綿涉歲勤特遷內使之華仍易中權之號  
遽形上奏稽我寵章宜副同寅即祇兼授

卿久勤樞務兼擁戎麾朝渥旌勞寵章異數疊形讓啓

深悉冲誠宜回再僕之恭徃對已成之命

賜知樞密院盛度讓恩命不允批答

卿茂宣忠力對掌機衡實嘉籌幄之勤俾換建牙之秩  
遽形讓奏稽我寵章宜副同寅即虔初授

賜參知政事程琳讓轉官不允批答

卿夙繼賢猷參知宰政尚講邦彛之要俾增臺轄之崇  
渙令已行讓封來上嘉其謙慙方切倚毗即服寵階無  
廢朝賞

賜參知政王巖讓恩命不允批答

卿德洽民宗才經政體蔽于朕志擢佐台猷顧承命之  
允諧何奏封而固避雖嘉有讓難廢同寅宜略謙懷用  
光賢舉

賜同知樞密院張觀讓恩命不允批答

卿適膺成命參掌繁機朝論允孚謙懷興讓宜虔往授  
以協至公

賜淮康軍節度使同中書門下平章事陳堯佐讓

恩命不允批答

卿近解政機榮兼將鉞游形讓奏彌諒謙懷矧誕告之  
徧聞當往諧而即受無煩遜執式副僉俞

賜新授武寧軍節度使赴本任王德用讓恩命不  
允批答

卿久服政樞存彌歲筦盡心匪懈均逸有常特移漢節  
之華近奠徐方之重詢于疇若僉曰宜哉疊覽讓封過  
辭恩典矧出綸之誕布顧收汗而罔繇宜略終謙時膺

茂渥

賜新授尚書侍郎同中書門下平章事章得象讓  
恩命不允批答

省表具知袞職華重槐階峻極必咨民望允釐天工卿  
頃幹鴻樞實稔休聞敷燮之任授受惟宜而謙情素懷  
累控重啓尋加敦諭尚執遜沖且策名者以舊庸為先  
體國者以獨善為細矧茲爰立方切仰成安得遂循牆  
之恭稽側席之竚時膺往命勿復煩辭所讓宜不允仍

斷來章

賜參知政事程琳讓轉官不允批答

卿識貫民宗望高時秀比繇卿貳擢贊宰司參決大猷  
總領衆職動本直道期于致君年績甫成朝寄滋重式  
疇忠概兼肅政機德賞之行公言無間遽披沖述深具  
至懷宜略常謙往服休命

賜新授參知政事王巖謙恩命不允批答

參毗國均食屬邦望卿忠力淵劬思懷凝簡擢考藩最

進貳政樞式時猷為濟厥文敏績用已試朕甚嘉之移  
贊宰庭俾暢賢業而介節難進剡奏自陳遜軌雖勞虛  
竚方切當廢確然之請庸副往哉之命

賜新授參知政事李若谷讓恩命不允批答

卿局力開濟思謀淹允歷踐衆職簡服近條以詳文飾  
吏師以精器剏京劇侃然奮德華我治朝宰路缺員邦  
均疇佐式咨民望參筦政機貪謀既同亮采惟竚遽披  
讓奏頗執沖規儻矜節自高則同體安寄宜屈終謙之



守時副欽鄰之重

賜新授宣徽南院使定國軍節度使知樞密院王  
德用讓恩命不允批答

卿茂負忠勞兼資才武曩藉世臣之重入司幾政之煩  
寵序節旄籌持帷幄左右無懈歷年于茲奚加使于微  
猷乃改藩于維翰疇功斯允讓爵載勤閱乃奏封尚稽  
拜秩固當畧循牆之小善體渙汗之明恩往踐崇階以  
穆公議

賜新授宣徽南院使定國軍節度使知樞密院王  
德用讓恩命不允批答

卿地服世忠勲在侯表久翊樞務遙制州師鄉疇匪懈  
之勤即寵兼榮之拜尋從誕告孰不謂宜夫何沖懷再  
爾牢讓矧宣猷使範持節戎麾蕃其典章蓋重帷幄朝  
食德舉咸出至公無執終謙之勞尚連信賞之實即斷  
重請時對茂恩

賜新授寧武軍節度使知樞密院盛度讓恩命不

允批答

對掌斗樞遙持將鉞隆名重器兼副實難卿望冠本朝  
謀經庶績曩咨雋又參處弼諧穆然清規式我彞序因  
儒林元老之懿換籌幄皇僚之華亦既歲成是光戎秩  
而游形讓懇固避寵階謙槩雖勞至公難廢即膺往授  
無復多陳

賜新授同知樞密院陳執中讓恩命不允批答

卿茂器清規冲懷勁節世詒忠教族擅邦華自結先朝

歷試衆職侃然直道形于造次逮升禁從連撫外藩咸  
惠並流聲實偕劭眷乃內樞之劇均于隆棟之求斷自  
朕懷召以軺傳諫垣籌幄相資為重命成之日僉曰宜  
哉何乃奏封猥形讓懇雖嘉遜挹方竚謀謨即服近司  
無淹盛典

賜新授同知樞密院張觀讓恩命不允批答

卿懿行雅材素襟直質曩絲士選來冠賢科椒蘭書殿  
之游斧藻辭垣之訓雖復間勤吏事中借身麾政本惠

和道無緇磷逮升禁署復總憲綱已試之能朕所親悉  
入司幾事誠協食謀渙命甫頒讓悵方確矧萬樞叢劇  
四近參裨天戒曠工邦思亮采宜略循牆之細用光側  
席之求時幹繁機卽斷來表

賜新授同知樞密院王博文讓恩命不允批答

卿儒操吏資邦華士望服于公路多厯歲期出勤宣布  
之和入備財煩之使聿疇聲實參估機衡朝無間言我  
得才舉奏封來上謙述有條雖難進之風可矜媮俗而

至公之授當廢沖懷往序近司無淹盛典

賜新授彰信軍節度使同中書門下平章事王隨  
讓恩命不允批答

卿擢自星樞魁升鉉席奮庸方劬嬰疾有初屢陳遜位  
之章姑倚調元之寄而太和未復前請重違爰解鈞衡  
寵頒旄鉞仍視台聯之秩俾令邦體之榮疊疏謙懷尚  
稽成命矧告虔之已洽非收汗之可圖宜副往諧即斷  
來請

賜新授淮康軍節度使同中書門下平章事陳堯佐讓恩命不允批答

台槐之尊以穆朝序方嶽之重以陪王室不有舊德曠可迭居卿比遜煩機是均斯寵誕告于外僉曰往諧游閱奏封固形謙執雖受爵而讓禮則當然而慎令以出恩無中廢宜屈辭豐之操協伸懋賞之公促拜徽章仍斷來請

賜鎮國軍節度使駙馬都尉李勗遵為疾病乞致

仕不允批答二首

卿勲伐之華材猷兼劭早膺尚禮實睦近嫻以駢馬之  
榮烈通侯之籍望高貴里時陟將壇而能出擅藩宣之  
勤居多位著之恪乃心道素探頤藝文余懷所嘉曷日  
而既今乃因晦明之偶沴援進退之大方確布書辭願  
致官政矧告旬未幾年力甫強謝仕而歸在禮安據卿  
其止念慮寶精神招還天和頃遲藥喜慰我虛疇勿復  
文陳



卿鄉苦癘疔甫淹時晦特優賜告用追頤生屬療治之  
未瘳覽控陳之迭至願還有政追踵昔賢高風所存媿  
俗知慕然卿地雖姍密器實虛恬情棲道腴行富天爵  
偶嬰無妄之疢固匪不衷之災視履其旋何恙弗已遽  
歸印綬殊惻朕心矧嚮福未涯與善無爽勉輔醫藥行  
復粹和姑廢沖懷卽斷來表

賜知樞密院王德用等賀壽星見批答

陽序布和瑞躔循軌爰覽日官之奏且符壽策之祥見

象孔昭撫躬增愧卿等協司樞務欣覲乾華平徹露辭  
熾昌歸美願因寶貺參紀信書矧在同寅協茲均慰勉  
從敷請良切歎嘉

元憲集卷二十九